

Visoki predstavnik Inzko se sastao sa predsjedavajućim slovenačkog parlamenta Jankom Veberom

Visoki predstavnik Valentin Inzko sastao se sa predsjedavajućim slovenačkog parlamenta Jankom Veberom. Visoki predstavnik Inzko izjavio je nakon sastanka sa predsjedavajućim Veberom da je spremnost Slovenije da nastavi izgrađivati konstruktivno partnerstvo sa Bosnom i Hercegovinom od nemjerljive vrijednosti. „Slovenija razumije situaciju u Bosni i Hercegovini i stoga može biti važan zagovornik interesa BiH u međunarodnoj zajednici“, rekao je visoki predstavnik Inzko.

Visoki predstavnik je istaknuo da Slovenija može služiti kao model za Bosnu i Hercegovinu, osobito kada je riječ o njenoj integraciji u međunarodne strukture. Naglasio je da je Slovenija i sama već provela niz reformi, od kojih su mnoge primjenjive i u Bosni i Hercegovini.

Također je rekao da se u Bosni i Hercegovini veoma cijeni solidarnost koju je pokazala Slovenija, kroz njen doprinos očuvanju mira i poslijeratnoj obnovi, te kroz diplomatsku podršku.

„Uvjeren sam da, ukoliko uspijemo prevazići trenutnu političku blokadu, Bosna i Hercegovina može sustići ostatak regiona i krenuti naprijed – između ostalog i uz pomoć Slovenije,“ rekao je visoki predstavnik. „To pitanje je od najveće hitnosti, jer sve dok traje politička blokada biće teško ponovno pokrenuti ekonomiju i zaustaviti potpuno neprihvatljiv pad životnog standarda.“